



Quellas dunnas e quels umens en vegnids undrads a Vicosoprano sco veteranas e veterans federals.

FOTOS G. N. STIGIER



Heinz Girschweiler, il president da la cumissiun da musica, vul ch' ils chors vegnian cun ideas e propostas per ils divers curs da l'Uniun chantunala da chant da noss chantun.

Auzament da la contribuziun annuala

Uniun chantunala da chant dal Grischun

DA GION NUTEGN STIGIER / ANR

■ In onn pli quiet è stà il 2013 per l'uniun tetgala che unescha chantaduras e chantadurs da noss chantun. Michaela Duschletta appartegna da nov a la suprastanza. Il zercladur 2015 ha lieu a Meiringen la Festa svizra da chant e fin uss è annunziads 22 chors grischuns. La vischnanca da Vicosoprano ha purschì tetg als delegads e las delegadas dals 135 chors ch'appartegnan a l'Uniun chantunala da chant dal Grischun. Organisa l'occurrència han ils dus chors il Coro misto Bregaglia ed il Coro virile Bregaglia. Sut la direcziun da Nadia Negrini han lura ils 25 umens dal Coro virile Bregaglia er dà il vestgi chantic a la radunanza e testifitgà ch'il chant viva er en quella Val dal sid da noss chantun. L'impurtanza dals chors da las Vals talianas dal Grischun è lura er stada en il center dal pled da bainvegna da Retus Giger, dapi 11 onns president da l'uniun cun 4235 commembers e commembras. Avant in onn

eran quai anc 280 chantaduras e chantadurs dapli, uschia che quel dumber conferma er che en noss chantun datti adina damain chors. Il 2012 eran anc 145 chors commembers da l'uniun tetgala ed actualmain en quai diesch pli pauc. Quitads fa a Retus Giger er la realitad che als chors manca la generaziun giuvna. En l'avegnir hajan l'uniun ed ils chors da vegnir pli activs quai che pertutga la promoziun da la nova generaziun da chant.

Undrientscha dals veterans e da las veteranas

In act festiv tar la radunanza è er adina l'undrientscha dals veterans e da las veteranas. Ils chors vivan da la fidaivladad da chantaduras e chantadurs, ha ditg Retus Giger. Senza veteranas e veterans fissan blers chors bunamain inexistent e perquai meritan tuts quels che chantan dapi decennis en in chor respect, ha ditg il Sursilvan als 100 preschents en la halla polivalenta a Vicosoprano. Undrads èn vegnids 43 chantadurs e chantaduras per

lur commembranza da 35 onns en in chor e dapi sonda èn tuts veterans federals. 44 umens e dunnas èn da nov veterans chantunals cun chantar dapi 30 onns en in chor. Dals 87 novs veterans federals e chantunals derivan gist 67 da chors rumantschs. Retus Giger ha dentant betg mo engrazià als undrads per lur fidaivladad tar in chor, mabain el ha chattà numerus plects bainvulents per mintgin che s'engascha en ina moda ubain l'autra per la cultura da chant.

Otg francs empè da quatter francs

La situaziun finanziaria da l'Uniun svizra dals chors è tut auter che plaschaivla. En il davos onn da gestiun ha quella schizunt fatg in deficit da 170 000 francs. Da preschent è er ina cumissiun londervi da chattar ina via per megliar la situaziun finanziaria da l'uniun cun 1500 chors e 37 000 commembers. Da nov ha mintga chor er da pajar a l'uniun tetgala svizra per mintga chantadur e chantadura empè da quatter francs otg francs. En num da divers chors rumantschs, sco per exempel ils

chors virils Ligia Grischa, Lumnezia e Surses ha Flavio Murer, il president dal Chor viril Ligia Grischa, fatg la proposta che quel auzament duai valair be per ils proxims tschintg onns. Ils preschents han sustegnì sia proposta e quai cleramain. Da nov pajan ils chors a l'uniun tetgala grischuna per mintga commember enstagl da 13.80 francs 17.80 francs. Persuenter han ils chors betg pli da pajar ils 150 francs per il Chorus, la gasetta che vegn betg pli mintga sis emnas. Dal reminent han las uniuns chantunals sustegnì l'Uniun svizra dals chors cun ina summa da 51 000 francs per levgiar la situaziun finanziaria malengraziavla.


Duas dunnas engaschadas en sa retratgas

Flavia Walder da Sevegin è s'engaschada ils davos tschintg onns cun corp ed olma per la promoziun da la generaziun giuvna da chant e stada ina suprastanza fitg activa sin quel champ. Ella è sa retratga da quel uffizi per sa concentrar sin l'organisaziun dal Festival svizzer per chors

d'uffants e da giuvenils che ha lieu il matg 2015 a Mustér. Fin uss èn gia annunziads per quel festival 37 chors e da quels er tschintg chors grischuns. Amarilli Fritz da Bever appartegna dapi il 2005 a la suprastanza da l'Uniun chantunala da chant ed è cunzunt stada fitg activa cun l'organisaziun dal forum da chors e dals divers curs. Er ella aveva inoltrà sia demissiun. Da nov han delegadas e delagds elegì Michaela Duschletta da Zernez en la suprastanza da l'Uniun chantunala da chant dal Grischun. Il zercladur 2015 ha lieu a Meiringen la Festa svizra da chant e fin oz èn gia annunziads er 22 chors da noss chantun. Retus Giger avess dentant plaschair sche intgins auters chors sa decidan tuttina per ina participaziun a la festa da chant en il chantun Berna. La proxima radunanza da l'Uniun chantunala da chant dal Grischun duai avair lieu sche pussaivel en quella vischnanca che segna per l'organisaziun da la Festa chantunala da chant 2018. Da preschent è quel lieu betg anc enconuscent.



Undrads en er vegnids aquellas chantaduras e quels chantadurs sco veteranas e veterans chantunals.



Dus presidents da dus chors da qualitat: Flavio Murer, Chor viril Ligia Grischa e Victor Blumenthal, Chor viril Lumnezia (da san.).



Las duas suprastantas partentas cun la nova suprastanta: Flavia Walder, Michaela Duschletta ed Amarilli Fritz (da san.).



Manuela Bühler (san.) ed Annemieke Buob, duas dunnas che s'engaschan fitg per la cultura da chant.



Ils umens dal Coro virile Bergaglia han embelli la radunanza a Vicosoprano.



Dus chantadurs fidaivels dal Cor viril Engiadina Bassa: Armon Parolini e Guido Huder (da san.).